



Inatsisartuni ilaasortaq Aleqa Hammond, Siumut
/MAANI

**Kalaallit timmisartortartut ilinniagaqarsimasut ilai maanna atorneqanngitsut suliffissarsiortaluartullu atorneqarnissaat qulakkeerumallugu Naalakkersuisut qanoq iliuuseqassamaarpat?
Inuusuttortatta ilinniagaqareerlutik inuiaqatigiinni suleqataanissaat atorfeqalernissaallu qulakkeerniarlugu Naalakkersuisut qanoq politikkeqarpat?**

Asasara Aleqa Hammond,

Marlunnik apeqquteqarputit, taakkulu kalaallit timmisartortartut ilinniagaqarsimasut Air Greenlandimit atorneqarsinnaanissaasa qulakkeerneqarnissaanut Naalakkersuisut pilersaarutaannut, kiisalu inuusuttut ilinniareerlutik atorfinitsinneqarnissamut periarfissaat pillugit Naalakkersuisut politikkiannut tunngasuupput.

Air Greenlandimi timmisartortartut ilinniartitaanermut, tamatumalu kingorna atorfinissinnaanermut periarfissanut tunngatillugu ilisimatitsissutigineqarsinnaavoq, timmisartuni suluusalinni, soorlu DHC7-imi timmisartortartut ilinniartitaanerit pillugit Air Greenland A/S-ip aamma Namminersorlutik Oqartussat akornanni ukiorpassuarni atuuttussamik isumaqatigiisummik peqartoqarmat. 2009-imi qulimiguulinni timmisartortartut ilinniartitaanerannut tunngatillugu tassunga assingusumik isumaqatigiissuteqartoqarpoq. Isumaqatigiissutip taassuma ataani suli qulimiguulinni timmisartortartunik naammassisoqarsimanngilaq, ilinniartitaaneq taanna sivikinnerpaamik ukiunik marlunnik sivisussuseqartarmat.

Air Greenlandimi sulisunut periusissatut pilersaarummi, ilaatigut ilinniartitaanerit nunaqavissunillu atorfinitsitsisarnerit aallunneqarnerisigut sumiiffimmi najugaqavissut salliutinneqarnissaat pingaartinneqarpoq.

Tassalu:

- Piffissaq qaninnerusoq ungasinnerusorlu eqqarsaatigalugit najukkami sulisorineqartut aallunneqarput aningaasaliiffigineqartarlutillu,
- Sulisussanik piginnaanilinnik piukkunnaatilinnillu sumiiffimmi najugaqavissunik imaluunniit Kalaallit Nunaannut qanittumik attuumassutilinnik atorfinitsitsisarnissamik anguniagaqartoqarpoq,
- Sulisut sumiiffinni najugaqavissut piginnaanerinik ineriartortitsinissaq salliutinneqarpoq,
- Air Greenland A/S ilinniarfittut annertusarneqarpoq, tassanilu ilinniarfut sumiiffimmi najugaqavissut imaluunniit Kalaallit Nunaannut qanittumik attuumassutilit suliatigut ilinniarfissani assigiinngitsuni ilinniagaqarnissamut aamma immikkut ittumik allaaserisaqarnissamut neqeroorfigineqartarput.

27. januar 2010
Sagsnr. 2010-024603
Dok. Nr. 299597

Postboks 909
3900 Nuuk
Tlf. (+299) 34 50 00
Fax (+299) 34 54 10
E-mail: aan@gh.gl
www.nanoq.gl

Tassalu Naalakkersuisut sulisartunik najugaqavissunik salliutitsinissamik anguniagaqarnerat Air Greenlandimit tapersorsorneqarpoq. Air Greenland timmisartortartunngorniat ilinniarfianni ilinniartussanik nutaanik toqqartuinermi suleqataasarpoq, timmisartortartut ilinnialersussat suliatigut taamatullu inuttut piginnaaneritut suliffeqarfiup piumasaqaataanut aamma naleqqunnissaasa qulakkeerneqarnissaa siunertaralugu.

Kiisalu ingerlatseqatigiiffimmit ilisimatitsissutigineqarpoq, 1. januar 2006-imiit 31. december 2009 tikillugu timmisartortartut 31-it atorfinitsinneqarsimasut, taakkunanngalu qulit sumiiffinni najugaqavissuusut imaluunniit Kalaallit Nunaannut qanittumik attuumassuteqarlutik. Timmisartortartut sumiiffinni najugaqavissut tamarmik pisariaqartitsilertarnerit malillugit, aammalu atorfinnut piumasaqaatit naammassineqarsimagaangata atorfinitsinneqartarput. Timmisartortartunik sumiiffinni najugaqavissunik suliffeqanngitsunik eqqortunik piginnaaneqartunik peqartillugu, Air Greenland avataaniit timmisartortartunik atorfinitsitsineq ajorpoq. Tassani eqqarsaatigineqassaaq, Kalaallit Nunaanni suliassanik immikkut ittunik amerlasuunik suliaqartoqartarmat (pingaartumik qulimiguulinnik timmisartuussisarnerup iluani), taakkunanilu immikkut piginnaaneqarnissaq piumasarineqartarpoq, taakkulu timmisartortartut nutaat, nalunaaquttap akunneri aalajangersimasut killeqartut timmisartorsimasut piginnaaneqarfigineq ajorpaat.

Tamatuma saniatigut ingerlatseqatigiiffiup ilisimatitsissutigaa, Air Greenland nunap iluani timmisartortartunik naleqquttunik nassaarsinnaatinnagu aatsaat atorfinitsitsinissaq qulakkeerniarlugu tamanut ammasumik sulisussarsiortoqartariaqartartoq. Qulimiguulinni timmisartortartut kalaallit piginnaanillit ukiorpassuarni amigaatigineqarsimapput, taamaattumillu qulimiguulinni timmisartortartut amerlanersaat avataaneersut atorfinitsinneqartarput.

Silaannakkut angallassinermut suliassaqarfimmilu piumanninnermut aningaasat nalingisa nikerarnerat apeqquataasarpoq, taamaattumillu ilinniakkaminnik naammassinnittut tamarmik naammassinerminni erngerlutik atorfinitsinneqarsinnaaneq ajorput, tamatigut pisariaqartitsisoqarneq ajorpat. Air Greenland timmisartortartunut najukkami ilinniarsimasunut, aallaqqaammut timmisartortartut atorfinitsinneqarsinnaanngitsunut, tamatumunngali taarsiullugu timmisartortartut atorfirmik inuttassarsiuilernissap tungaanut Air Greenlandimi suliassaqarfinni allani suliaqartinneqartunut qanittumik attaveqartarpoq. Atorfinitsitsisarnermi ilinniakkap suunera aammalu suliatigut taamatullu inuttut piginnaasat eqqarsatigineqarnissaat malinneqartarpoq.

Air Greenlandip suliffeqarfittut timmisartortartut peqatigiiffiannut isumaqatigiissuteqarsimavoq, tassanilu atorfinitsitsisarnermut soraarsitsisarnermullu piumasaqaatit aalajangersarneqarsimapput. Isumaqatigiissummi timmisartortartunik atorfeqartinneqareersunik soraarsitsilluni timmisartortartunik najugaqavissunik ilinniakkaminnik naammassinernlaanik taarsersuinissamut inatsisitigut tunngavissaqartoqanngilaq, tamannalu aamma isumannaallisaanermik ulorianartorsiortitsilersinnaavoq, taamatullu piginnaanernik annaasaqarfiusussaalluni.

Air Greenlandimi timmisartortartut, Namminersorlutik Oqartussat suleqatigineqarnissaannut isumaqatigiissutit pioreersut aqutugalugit ilinniagaqarsimasut eqqumaffigineqarput, kisiannili ingerlatseqatigiiffimmiit erseqqissarneqarpoq, inuit ilaat aamma aqqissuussinerit taakku avataanni ilinniarniarnissaminnik toqqaasarmata. Ilinniartitaanerit taakku tamarmik tamatigut piginnaanernik eqqortunik pissarsiviuneq ajorput, imaluunniit pitsaassuserititassanik, Air Greenlandip malitassaanik naammassinnineq ajorlutik.

Ilinniakkap naammassinerani atorfininnissamut periarfissaqarnissamut atatillugu Naalakkersuisut politikkiannut tunngatillugu Namminersorlutik Oqartussat anguniagaat, inuiaqatigiit kalaallit aningaasaqarnikkut kulturikkullu ineriartormikkut aningaasaqarnikkut politikikkullu kiffaanngissuseqalernissaat, tamannalu inuiaqatigiit ilinniartitaanerit, piginnaanerminnik ineriartortitsinerit oqaloqatigiinnerallu, kiisalu namminersulernissamik suliaqarnermi peqataanissamut ataatsimut pilersaaruserit aqutugalugu piviusunngortikkiartuaarneqarsinnaavoq. Oqaloqatigiinnerit aalajangiisernerillu tamanut ammatineqassapput, taamaalillunilu ataatsimoorfiussamik siunissaqarnissamut innuttaasut peqataassapput.

Kisiannili suliffissat piumaneqarnerat, kiisalu aningaasat naligisa nikerarnerat atorfininnissamut periarfissanut sunniuteqarsinnaapput, taamatullu aamma inuttut piginnaasassat pigineqartussaallutik. Tassalu suliffissaqartitsinerup iluani pissutsit ilaat atorfininnissamut akimmisaartitsisinnaapput, taamatullu suliassaqarfiit ilaanni ilinniagaqarnikkut inuttulluunniit piginnaanerit aalajangersimasut, atorfinitsinneqarsinnaanermut pingaaruteqartut pisariaqartinneqartussaallutik.

Inussiarnersumik inuulluaqqusilluta

Jens B. Frederiksen